

LIGJ

Nr. 30/2015

PËR DISA NDRYSHIME DHE SHTESA NË LIGJIN NR. 8652, DATË 31.7.2000, “PËR ORGANIZIMIN DHE FUNKSIONIMIN E QEVERISJES VENDORE”, TË NDRYSHUAR

Në mbështetje të neneve 13, 81, pika 2, 83, pika 1, 84, pika 4, dhe 108-115 të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË

V E N D O S I:

Në ligjin nr. 8652, datë 31.7.2000, “Për organizimin dhe funksionimin e qeverisjes vendore”, të ndryshuar, bëhen këto ndryshime dhe shtesa:

Neni 1

Kudo në ligj, fjalët “komunë”, “kryetar komune” e “këshilli i komunës” hiqen.

Neni 2

Në nenin 2, pas pikës 15 shtohet pika 16 me këtë përmbajtje:

“16. “Konsultimi” ndërmjet institucioneve të pushtetit qendror dhe njësive të qeverisjes vendore është një proces institucional, transparent dhe i drejtpërdrejtë, për informimin, këshillimin dhe shkëmbimin e opinioneve për politikën, legjislacionin e normat që rregullojnë qeverisjen vendore, i cili zhvillohet rregullisht dhe në mënyrë të vazhdueshme, sipas procedurave dhe një strukture të përcaktuar.”.

Neni 3

Në nenin 4, pika 2 ndryshohet si më poshtë:

“2. Marrëdhëniet ndërmjet organeve të njësive të qeverisjes vendore dhe institucioneve të qeverisjes qendrore bazohen në parimin e subsidiaritetit, të konsultimit dhe të bashkëpunimit për zgjidhjen e problemeve të përbashkëta.”.

Neni 4

Neni 5 ndryshohet si më poshtë:

“Neni 5

Përcaktimi: bashki, qark dhe nënndarjet

1. Bashkia është njësi bazë e qeverisjes vendore.
2. Bashkia përfaqëson një unitet administrativo-territorial dhe bashkësi banorësh. Bashkitë, shtrirja territoriale, emri dhe qyteti qendër i saj përcaktohen me ligj.
3. Bashkia përbëhet nga disa njësi administrative, sipas lidhjeve tradicionale, historike, ekonomike dhe sociale. Njësitë administrative në territorin e një bashkie, shtrirja e tyre territoriale dhe emri përcaktohen me ligj.
4. Njësitë administrative përbëhen nga qytetet dhe/ose fshatrat. Shtrirja territoriale, emri i qyteteve dhe fshatrave, pjesë e çdo njësie administrative, përcaktohen me ligj. Shpallja e qyteteve të reja bëhet me ligj.
5. Qytetet mund të ndahen në njësi më të vogla që quhen lagje. Një lagje mund të krijohet vetëm në territore, që si rregull kanë mbi 20 mijë banorë. Ndarja e qyteteve në lagje dhe shtrirja e tyre territoriale miratohet me vendim të këshillit bashkiak.
6. Qarku është njësi e nivelit të dytë të qeverisjes vendore.
7. Qarku përfaqëson një unitet administrativo-territorial të përbërë nga disa bashki me lidhje gjeografike, tradicionale, ekonomike, sociale dhe interesa të përbashkët. Kufijtë e qarkut përpunohen me kufijtë e bashkive që e përbëjnë atë. Qendra e qarkut vendoset në një nga bashkitë që përfshihen në të. Shtrirja territoriale, emri dhe qendra e qarkut përcaktohen me ligj.”.

Neni 5

Në nenin 8, pika 1, pas nënndarjes “V” shtohet nënndarja “V/1” me këtë përmbajtje:

“V/1. E drejta e konsultimit

a) Njësitë e qeverisjes vendore konsultohen, nëpërmjet shoqatave të të zgjedhurve vendorë dhe grupeve të tjera të interesit, në kohën dhe mënyrën e duhur, që u mundëson prezantimin e opinioneve dhe propozimeve të tyre për politikën dhe legjislacionin që ka ndikim të drejtpërdrejtë në ushtrimin e të drejtave dhe funksioneve të tyre.

b) Procesi i konsultimit zhvillohet sipas procedurave dhe brenda kuadrit të një strukture të përcaktuar. Ngarkohet Këshilli i Ministrave për hartimin e akteve nënligjore që përcaktojnë strukturën, formën, mënyrën e organizimit, funksionimin, natyrën e çështjeve për konsultim dhe frekuencën kohore të procesit të konsultimeve.”.

Neni 6

Në nenet 15, pika 5, dhe 19, pikat 4, 5, 8 e 9, fjalët “ligjin nr. 8379, datë 29.7.1998, “Për hartimin dhe zbatimin e Buxhetit të Shtetit të Republikës së Shqipërisë”,” zëvendësohen me fjalët “legjislacionin në fuqi që rregullon menaxhimin e sistemit buxhetor dhe financave vendore në Republikën e Shqipërisë”.

Neni 7

Neni 24 ndryshohet si më poshtë:

“Neni 24

Numri i anëtarëve të këshillit bashkiak

1. Numri i anëtarëve të këshillit bashkiak përcaktohet sipas numrit të popullsisë si më poshtë:

- Bashkitë deri në 20 000 banorë	15 anëtarë;
- Bashkitë nga 20 001 deri në 50 000 banorë	21 anëtarë;
- Bashkitë nga 50 001 deri në 100 000 banorë	31 anëtarë;
- Bashkitë nga 100 001 deri në 200 000 banorë	41 anëtarë;
- Bashkitë nga 200 001 deri në 400 000 banorë	51 anëtarë;
- Bashkitë mbi 400 000 banorë	61 anëtarë.

2. Në zbatim të këtij neni, prefekti përcakton numrin e anëtarëve të këshillit për çdo bashki nën juridiksionin e tij, mbi bazën e numrit të banorëve, sipas evidencave të zyrave të gjendjes civile të datës 1 janar të vitit kur zhvillohen zgjedhjet.”.

Neni 8

Në nenin 32, shkronjat “ç” dhe “dh” ndryshohen si më poshtë:

“ç) Miraton nivelin e pagave dhe shpërblimeve të punonjësve e të personave të tjerë të zgjedhur ose të emëruar, në përputhje me legjislacionin në fuqi.

dh) Miraton buxhetin dhe ndryshimet e tij. Në vendimin për miratimin e buxhetit miraton, gjithashtu, edhe numrin e maksimal të punonjësve të bashkisë, si dhe të njërive e institucioneve buxhetore në varësi të bashkisë.”.

Neni 9

Në nenin 35, pika 3 ndryshohet si më poshtë:

“3. Aktet e këshillit afishohen në vende publike të caktuara nga këshilli, brenda territorit të bashkisë dhe, sipas mundësive, këshilli cakton edhe forma të tjera të publikimit të tyre. Informimi i publikut në çdo bashki bëhet në përputhje me legjislacionin në fuqi për të drejtën e informimit dhe për njoftimin e konsultimin publik, si dhe me rregullat e përcaktuara nga vetë këshilli përkatës për këtë qëllim.”.

Neni 10

Në nenin 39, pika 1 ndryshohet si më poshtë:

“1. Çdo bashki ka kryetarin e saj, të zgjedhur çdo katër vjet në zgjedhje të përgjithshme, të drejtpërdrejta dhe me votim të fshehtë, sipas mënyrës së parashikuar në Kodin Zgjedhor të Republikës së Shqipërisë.”.

Neni 11

Në nenin 44 bëhen ndryshimet dhe shtesa e mëposhtme:

1. Shkronja “ç” ndryshohet si më poshtë:

“ç) raporton në këshill për gjendjen ekonomiko-financiare të bashkisë dhe njësive administrative përbërëse, të paktën çdo 6 muaj ose më shpesh, sa herë kërkohet nga këshilli.”.

2. Shkronja “f” ndryshohet si më poshtë:

“f) emëron dhe shkarkon punonjësit e tjerë jodrejtues të strukturave dhe njësive në varësi të bashkisë, përveç kur parashikohet ndryshe në legjislacionin në fuqi për nëpunësit civilë;”.

3. Pas shkronjës “h” shtohen shkronjat “i” dhe “j” me këtë përmbajtje:

“i) miraton strukturën organizative dhe rregulloret bazë të administratës së bashkisë dhe të njësive e institucioneve buxhetore në varësi të bashkisë;

j) emëron dhe shkarkon administratorët e njësive administrative/lagjeve.”.

Neni 12

Titulli i kreut VIII ndryshohet dhe zëvendësohet me titullin “Drejtimi dhe funksionimi i njësisë administrative”.

Neni 13

Në fillim të kreut VIII, para nenit 45 shtohen nenet 44/1 dhe 44/2 me këtë përmbajtje:

“Neni 44/1

Administrata e njësisë administrative

1. Në njësitë administrative funksionon administrata që drejtohet nga administratori.

2. Administratori emërohet dhe shkarkohet nga kryetari i bashkisë dhe është përgjegjës para tij për funksionimin dhe veprimtarinë e administratës. Administratori duhet të ketë vendbanimin në njësinë administrative përkatëse.

3. Struktura dhe organika e administratës së njësive administrative, është pjesë e strukturës dhe organikës së administratës së bashkisë.

Neni 44/2

Detyrat e administratës së njësisë administrative

1. Administrata e njësisë administrative brenda juridiksionit të caktuar territorial kryen këto detyra:

a) është zyrë e shërbimit për të gjitha procedurat administrative në kompetencën e bashkisë;

b) mbikëqyr territorin për zbatimin e ligjit në të gjitha fushat në kompetencën e bashkisë dhe njofton strukturat kompetente të bashkisë në rast të konstatimit të veprimeve në kundërshtim me ligjin;

c) mbështet punën e strukturave kompetente të bashkisë;

ç) bazuar në vendimin e këshillit të bashkisë mund të administrojë parqet, lulishtet dhe zonat e gjelbëruara;

d) bazuar në vendimin e këshillit të bashkisë mund të administrojë tregjet publike;

dh) bazuar në vendimin e këshillit të bashkisë mund të administrojë këndet e lojërave, terrenet sportive, bibliotekat, shtëpitë dhe klubet e rinisë;

e) përgatit dhe i propozon kryetarit të bashkisë planin për investimet nën juridiksionin e saj territorial si dhe mbikëqyr, pas miratimit, zbatimin e tyre sipas ligjit;

ë) propozon, sipas ligjit, emërtimin e rrugëve, shesheve, institucioneve dhe objekteve që janë nën juridiksionin e saj territorial;

f) mbështet, koordinon dhe mbikëqyr veprimtarinë e kryetarëve dhe kryesive të fshatrave;

g) i propozon kryetarit të bashkisë dhënien e titujve të nderit dhe stimujve për personat nën juridiksionin e saj territorial;

gj) propozon marrjen e nismave në dobi të komunitetit brenda juridiksionit të saj territorial;

h) kryen çdo funksion tjetër të deleguar nga kryetari apo këshilli i bashkisë.

2. Administratori i njësisë administrative është organi kompetent për konstatimin dhe shqyrtimin e kundërvajtjeve administrative, të përcaktuara si të tilla me akte të këshillit bashkiak, brenda juridiksionit të caktuar territorial.

3. Administratori mund t'i delegojë kompetencën e parashikuar në pikën 2, të këtij neni, nëpunësve të administratës në varësi.”.

Neni 14

Në nenin 45 bëhen këto ndryshime:

1. Titulli i neni ndryshohet dhe zëvendësohet me titullin “Drejtimi i fshatit”.

2. Pikat 4 dhe 5 ndryshohen si më poshtë:

“4. Zgjedhjet e kryesisë dhe të kryetarit të fshatit bëhen një herë në katër vjet pas zgjedhjeve për këshillin bashkiak dhe jo më vonë se tre muaj pas këtyre zgjedhjeve.

5. Në rastet e krijimit të vendit vakant për kryetarin e fshatit ose për anëtar të kryesisë zhvillohen procedurat e mësipërme të zgjedhjes për vendin vakant. Mandati i të zgjedhurit të ri vazhdon deri në përfundim të periudhës së mbetur të afatit katërvjeçar.”.

Neni 15

Në nenin 47 bëhen këto ndryshime:

1. Titulli i neni ndryshohet dhe zëvendësohet me titullin “Administrimi i lagjes”.

2. Pika 1 ndryshohet si më poshtë:

“1. Në rastin e krijimit të lagjeve, sipas pikës 5, të neni 5, të këtij ligji, në secilën lagje krijohet dhe funksionon administrata e lagjes, që drejtohet nga administratori i lagjes. Administratori i lagjes emërohet dhe shkarkohet nga kryetari i bashkisë. Nëpunësit e tjerë të administratës trajtohen sipas legjisllacionit në fuqi për nëpunësin civil.”.

Neni 16

Neni 48 shfuqizohet.

Neni 17

Në nenin 50, pikat 1 dhe 2 ndryshohen si më poshtë:

“1. Numri i përfaqësuesve të bashkive në këshillin e qarkut caktohet në përpjesëtim me numrin e popullsisë si më poshtë:

- Bashkitë me popullsi deri në 20 000 banorë	2 përfaqësues.
- Bashkitë me popullsi 20 001 deri në 50 000 banorë	4 përfaqësues.
- Bashkitë me popullsi 50 001 deri në 100 000 banorë	5 përfaqësues.
- Bashkitë me popullsi mbi 100 000 banorë	5 + nga një përfaqësues

shtesë për çdo 1 deri në 50 000 banorë mbi 100 000 banorë.

2. Brenda numrit të përfaqësuesve për çdo bashki, sipas pikës 1, përfshihet kryetari i bashkisë, si dhe përfaqësuesit e tjerë që zgjidhen nga këshilli i bashkisë.”.

Neni 18

Në nenin 58, pika 1 ndryshohet si më poshtë:

“1. Kryesia e këshillit të qarkut përbëhet nga kryetari, zëvendëskryetari dhe nga 3 deri në 5 anëtarë të tjerë.”.

Neni 19

Në nenin 60, shkronja “dh” ndryshohet si më poshtë:

“dh) emëron dhe shkarkon personelin e administratës së këshillit të qarkut, përveç rasteve të parashikuara ndryshe në legjislacionin në fuqi për nëpunësit civilë.”.

Neni 20

Në nenin 70, pas pikës 2 shtohet pika 3 me këtë përmbajtje:

“3. Procedurat dhe masat për transferimin e të drejtave dhe detyrimeve, aktiveve të trupëzuara dhe të patrupëzuara, të arkivave dhe çdo dokumentacioni tjetër shtetëror në njësitë e qeverisjes vendore, të krijuara ose të prekura nga riorganizimi përcaktohen me vendim të Këshillit të Ministrave.”.

Neni 21

Pas nenit 75 shtohen nenet 75/1 dhe 75/2 me këtë përmbajtje:

“Neni 75/1

Organet e njërive të qeverisjes vendore, të konstituara pas zgjedhjeve vendore të vitit 2011 dhe me juridiksion territorial, sipas ndarjes administrativo-territoriale, të përcaktuar me ligjin nr. 8653, datë 31.7.2000, “Për ndarjen administrativo-territoriale të njërive të qeverisjes vendore në Republikën e Shqipërisë”, të ndryshuar, dhe me ligjin nr. 8654, datë 31.7.2000, “Për organizimin dhe funksionimin e Bashkisë së Tiranës”, vazhdojnë funksionimin e tyre deri në konstituimin e organeve përfaqësuese dhe ekzekutive të njërive të qeverisjes vendore në zgjedhjet e vitit 2015.

Neni 75/2

Deri në datën 31 dhjetor 2017, në çdo njësi administrative funksionon administrata e njësisë administrative. Nga 1 janari 2018, këshilli i bashkisë ka kompetencën të vendosë për riorganizimin e administratave të njërive administrative, të cilat mund të mbulojnë territorin e një ose më shumë njërive administrative brenda bashkisë, sipas nevojave të komuniteteve vendore dhe efektshmërisë administrative.”.

Neni 22

Ky ligj hyn në fuqi menjëherë.

K R Y E T A R I

Ilir META

Miratuar në datën 2.4.2015